

江防總論  
江防述略  
海寇議

海防總論  
江防集要

海防述略  
海防集要



海  
防  
述  
略

杜  
臻  
著

中  
華  
書  
局

# 海防述略

廣東

清秀水杜 臻遇徐著

廣東列郡者十分爲三路。惠潮爲東路。省會廣州爲中路。高雷廉爲西路。東路與福建連壤。而潮爲嶺東之巨鎮焉。柘林南澳俱係要區。枕吭撫背之防。不可一日緩。而靖海海門蓬州大城諸所。又皆跬步海濤所賴以近保三陽。遠衛東嶺者也。惠州海豐。東南濱海。其捷勝平海碣石甲子門。皆瞬息生變。儼柘林南澳失守。是無潮也。平海碣石失守。是無惠也。而不知柘林之地。尤爲南粵海道門戶。據三路之上遊。番船自福趨廣。悉由此入。舊例風汛之期。各澳皆設戰艦。秋盡掣回水寨。此在他澳猶可。柘林去水寨一日之遠。警報未易達。倘賊視我無備。乘虛衝突。不亦危乎。故必以慎固柘林爲要。而附近城所戍卒。互爲聲援。斯爲勝算焉。至南澳當因廣交界在大海之中。乃明初起發居民遺棄之地。嘉隆間倭泊於此。互市。廣捕急則奔閩。閩捕急則奔廣。而海寇許朝光吳平之徒。巢穴于此。故萬歷三年。設副總兵以彈壓之。若廣州地雖中處。而環郡大洋風濤千里。皆盜賊淵藪。帆檣上下。烏合突來。接船屯哨。可容緩乎。嘗考諸島入寇。多自閩趨廣。柘林設備遏其衝。而不得泊。勢必越于中路之屯門雞棲佛堂門冷水角老萬山虎頭門等澳。而南頭爲甚。或泊以寄潮。或據爲巢穴。附海有東莞大鵬戍守之兵。往來巡哨。遇警輒敵。必不敢泊此。

矣。勢必歷峽門、望門、大小橫瑟山、零丁洋、仙女澳、九竈山、九里洋等處而西，而浪白澳爲甚。乃番舶等候接濟之所也。附海有香山所戍守之兵，往來巡哨，遇警輒敵，則亦不敢泊此矣。勢必歷崖門、塞門、海萬斛山、硎州等處而西，而望峒澳爲甚。乃番舶停留避風之門戶也。附海有廣海衛新寧海朗所戍守之兵，往來巡哨，遇警輒敵，則又不敢泊此矣。夫其來不得停泊，去不得接濟，雖濱海居民，且安枕而臥，況會城乎。其西路高雷廉三郡，以倭寇東來言之，似防守之責可緩。然三郡逼近古城、暹羅、滿刺諸番，島嶼森列，遊心注盼，防守少懈，則變生肘腋，滋蔓難圖矣。按高州東連肇廣，南憑溟渤，一帶海澳，若蓮頭港、汾州山、兩家灘、廣州灣，爲來府之南翰，兵符重寄，不當託之匪人，以貽保障之羞也。雷州突出海中，三面受敵，其遂溪、湛川、漳州、樂民等四十餘隘，固爲合衛三道門戶。而海安、海康、黑石、清道、并徐聞、錦囊諸隘，所以合防海澳，操縱反側者也。若廉州則尤爲全廣重輕，故兵符特割于靈山達堡，增屯于衛北海寇峒獠外，蘇之憂，視三嶺獨勞焉。西南雄郡瓊，爲廉之外戶，五脂腹心，盡爲黎據，郡邑封疆，無不濱海。若白沙、石瓊、館頭、文昌、海安、海康，對峙番島，飄風突來，防禦甚艱。凡此皆西路所當汲汲經畫者也。故其分守也，東路則于柘林設把總，哨至豬頭嶼與碣石會，碣石設把總，哨至大星洋與南頭會，而惠潮則有參將之設。南澳又有漳潮副總之設，中路則于虎頭門設把總，哨至三角州與廣海會，廣海設守備，哨至黃巖門與北津會，而廣州則又有海防參將之設。西路則于陽電設參將，哨至赤水洋與白鴿會，白鴿門設把總，哨至海安港與漳州會，而漳州則有遊擊，雷廉則又有副總兵之設。瓊州白沙塞則又有把總，崖州則又有參將之

設。所以備粵寇者如此。

### 福建

入閩之地。西北阻山。東南濱海。其鋒火之臺山。小埕之東湧海壇。東庠。南日。烏邱。浯嶼。澎湖。元鍾。銅山。皆島寇必經之地。故分布五寨以鎮之。俱江夏侯所設也。一曰浯嶼水寨。始設于海邊舊浯嶼山外。有以控大小岨嶼之險。內可以絕海門月港之奸。誠爲要區。後遷入廈門。舊浯嶼棄而不守。遂使番船南來。據爲巢穴。是自失一險也。今欲復舊制。則孤懸海中。既鮮村落。又無生理。一時寇來攻劫。哨援不及。兵船之設。何益哉。故與其議復舊規。孰若慎密廈門之控。予以控泉州之南境。自岱墜以南。接于漳州。哨援聯絡。豈非計之得者哉。一曰南日水寨。原設于海中。南日山下。北可以遏南茭湖井之衝。南可以阻湄洲岱墜之險。亦要區也。景泰以來。乃奏移莆田縣之吉了。仍以南日爲名。舊南日寨而不守。遂使番船北向。泊以寄潮。是又失一險也。今之事體。與浯嶼相倣。一曰烽火門水寨。原設于福甯州三沙海中。永樂間倭寇犯境。議撥福寧衛大金所官軍防守。秦嶼。羅浮。官井洋。皆轄焉。正統九年。侍郎焦宏以其地風濤洶湧。不便棲船。徙今松山寨地方。其後官井洋雖添設水寨。而沙埕。羅江。古鎮。羅浮。九澳等險。孤懸無援。勢不能復舊矣。一曰銅山水寨。漳州府所轄也。漳浦一縣。最近海嶼。聲水寨者二。銅山西門澳爲把總水寨。而元鍾則受其節制焉。故今止以五寨爲名。初水寨在井尾澳。景泰間移今西北地方。北自金石以接浯嶼。南自梅嶺以達廣東。險隘所係。匪淺淺也。況倭船自浙趨閩。所必由。宜嚴遏其衝。并絕慣徒之勾引接濟者。則有

以控八閩上遊之勢矣。一曰小埭水寨。北連界于烽火。南接壤於南日。蓋連江爲福郡之門戶。而小埭爲連江之藩翰也。海壇連盤。雄踞聳峙。若南屏然。爲賊船之所必泊。其所轄閩安。鎮北。菱焦山。諸巡司。爲南北中三哨。無事往來探視。有警協力出戰。則此寨之設。爲不虛矣。番船自粵趨閩。而入于南澳。粵雲蓋寺走馬溪。乃番船始發之處。慣徒交接之所也。附海有銅山。去鍾等哨守之兵。若先分兵守此。則有以遏其衝。而不得泊矣。其勢必拋于外。活嶼。外活嶼。乃五澳地方番人之窠窟也。附海有活嶼。安邊等哨守之兵。若先會兵守此。仍撥小哨守把緊要港門。則必不敢以泊此矣。其勢必趨于料羅。烏沙。此番船等候接濟之所也。附近有官澳。金門等哨守之兵。若先會兵守此。則又不敢以泊此矣。其勢必趨于福興。若越于福興。計其所經之地。南日則有代墜。湄州等處。在小埭則有海壇。連盤等處。在烽火門則有官井。流江。九澳等處。此賊船之所必泊者也。若先會兵守此。則又不敢以泊此矣。來不得停泊。去不得接濟。船中水米有限。人力易疲。將有不攻而自潰者。況乘其疲而夾力攻之。豈有不勝者哉。故其分守也。銅山寨領以把總。南哨至洪淡。巡司北哨至東鎮洋。又于舊轉元鍾所增遊兵寨。設南澳。把總領之。分哨雲蓋寺。走馬溪等處。而聽節制于漳潮之總兵。活嶼寨領以把總。南哨至舊活嶼。北哨至大岸山。而又特于南路設副總兵。兼轄起祥。芝苴底。廣東界之信地。南日寨領以把總。南哨至金沙澳。北哨至蘇澳。與海壇哨會。海壇則又增設把總。領遊兵分哨觀音。胡廬等澳。會爲小埭之南藩。小埭寨領以把總。南哨至白大山。北哨至西洋山。與烽火哨會。而又特于中路設參將。兼轄起懷澳。直抵泉州郡祥芝之信地。烽火門寨領以把總。南哨至

小西洋、北哨至官澳，而又特于北路設參將，兼轄起福寧，直抵寧德縣廉澳之信地，所以備閩寇者如此。

### 浙江

兩浙、日本舊時貢道在焉。論列郡之海口，則温州之飛雲、橫陽、館頭、台州之松門、海門、寧波之定海、太液、湖頭渡、紹興之三江、沙門、杭州之赭山、龔山、嘉興之乍浦、澈浦，皆海寇規犯之地。列郡之門戶也。論洋海之要害，則金盤之鳳凰山、南麂山、松海之大陳、大佛頭、昌國之韭山、定海之舟山，遠而陳錢、馬蹟、下八山、臨觀之烈港、海寧之洋山、許山，皆洋寇必經之地。沿海之藩籬也。然温州與閩境接壤，寇賊揚帆，必首嘗之。惟先嚴莆門鎮下官嶼、南臺之險，以扼其來。于此不戒而入內地，則溫爲正兵，而台爲應援。寧區速宜戒備矣。台州四塞之國，南有桃嶼、金竹，北有桑州、桐巖，西有關山、衛墅、疊嶂、層岡，重關鳥道，而且南去盤石、楚門，僅百五十里。東南去松門僅百里。東去海門僅八十里。設或海寇棄舟登陸，皆可卒至城下。自海門而上者，則一潮直達。三面阻山，一面瀕海，孤懸于數百里之外，孤危之勢，誠可畏也。務在加力防守。過溫而台，則台爲正兵，寧爲應援。溫則爲後襲矣。寧區之衝，石浦、昌國爲最。石浦一城，去昌國僅十里。城下一帶水涯，堪以栖泊戰船。對面有山，卽石浦舊城。山外大洋，有山名曰壇頭，盜船出沒，輒乘其地。故閩寇南犯，必由三門、林門、下灣門、東門、四路而入。倭寇東犯，必由牛欄基、洞下門等處而入。今策其最要，則洞下門逼近石浦所城，其港頗窄，其潮甚急，賊船進此，必紆回罄折于兩岸夾山之下，而石浦左連一山，名

打銅坑與洞下門直衝相對。撥兵分據。使寇艘不得飛渡。所謂以逸待勞。此守洞下門之一策也。三門去石浦頗遠。與台區未門海洋鄰界。其港頗闊。以諸汛稍緩之兵。併力隄防。此守三門之一策也。至下灣門外。係壇頭大洋。內則舊城東門。港闊潮急。且與火爐頭對峙。于火爐頭更宿重兵。與對岸舊城東門互相防擊。此守下灣門之一策也。而其最要者。則定海一城。乃全浙門戶。且東北一隅。山石參差。每爲下塗捷徑。倘賊舟揚帆直抵城下。尤宜備禦。杭州則鼈子門者。乃省城第一門戶。石墩鳳凰外峙。乃第二門戶。此外無山。唯羊許獨立海中。東接衢洋。西控吳淞江口。爲第三門戶。洋許二山有防。然後石墩鳳凰有蔽。石墩鳳凰有蔽。然後錢塘鼈子門可寧。此其大略也。嘉區之南鹽海寧。及乍浦。澈浦。梁莊等處。海以城爲垣。城以海爲池。去城不及半里。登岸即可攻掠。所謂洋山許山者。遠落大洋。不知何處矣。往者攻犯乍浦。慘不忍言。願議及浙海。輒以寧紹台溫爲上游。而嘉區爲可緩。不知嘉區西浙之門戶也。故其分守也。浙江有六總。金鄉盤石二衛設把總一。南興福建烽火會哨。北興松門關會哨。轄溫州沿海延袤四百餘里。而節制之以溫處之參將。松門海門二衛設把總一。南哨至蒲岐。北哨至昌國石浦港。轄台州沿海延袤五百餘里。而節制之以金台嚴之參將。昌國衛設把總一。領本衛并在外前後錢爵四所。及遊仙寨。而以南起石浦馮家山。北抵南湖頭爲信地。定海衛設把總一。領本衛并在外後所。鄞衢大嵩中。中左五所。而以南起湖頭渡。北抵管界。巡司及外海舟山爲信地。觀海臨山二衛設把總一。領寧紹地方。西自三江所。東至龍山所。延袤三百餘里。及在外金家島爲信地。而皆節制之以寧紹之參將。海寧衛設把總一。則浙

江沿海一帶起自鼈子門直抵金山衛延袤五百餘里皆屬焉而節制之以杭嘉湖之參將所以備浙寇者如此

### 江南

江南東濱巨海北亘長淮中貫大江其與浙江連界者爲松江自金山衛至南匯所官軍各分信地而金山北衛松江南援乍浦尤爲要區若金山以東有翁家港蔡家港柘林滬缺等處南匯以北有四五六七八九圍洪口川沙窪清水窪等處防守宜嚴萬一外守不固則黃浦一帶又爲蘇松險要守浦乃所以守門戶也今吳淞江口卽爲黃浦口子故設兵一枝以防深入至于上海之高倉渡沈莊塘周浦閘港閔行華亭之葉謝曹涇張堰等處賊一登岸渡浦甚易防禦宜密然寇船之來必至海外太山停舶候齊則洋山之地外爲定海吳淞江會哨兵船之羽翼內爲海港把守兵船之捍衛矣蘇州沿海一帶險隘甚多常熟有福山港白茆塘太倉有劉家河七丫港嘉定有吳淞江黃窯港皆賊之通衢而東吳之門戶此則所謂一府之險要長洲則泖湖浩蕩吳江則鴛湖相屬吳縣則太湖交通皆賊之徑道而腹裏之關隘此則所謂一縣之險要其次則福山以西有三丈浦斜橋以東有許浦金涇劉家河以北有新塘浪港茜徑吳淞江以南有寶山以東有老鵝嘴均之所謂險要而少次焉者況海濱數百里一望平坦非有山嵐險阻爲之扼塞皆可以泊船登岸兵力有限而防禦之計當先其大者以海邊惟福山爲最以腹裏惟勝墩爲最故劉家河吳淞江福山港舟師防守不可單弱白泖口七丫港黃窯港俱當預設戰艦庶與各港相爲

特角。又如賊自東南而來，必由寶山吳淞江。宜于吳家沙堵截之。賊自東北而來，必由三沙劉家河。宜于營前沙堵截之。則蘇之外防，或可無憂。至于風汛時月，吳淞水兵統發勝墩平望，以防嘉興突犯之寇。吳縣水兵統發太湖，以防蠡里突犯之寇。長洲水兵統發周莊，以防泖湖突犯之寇。則蘇之內防，或可無憂。惟吳淞所爲水陸之要衝，蘇松之喉吭，提兵南向，可以援金山之急，揚帆北哨，可以扼長江之險者也。崇明孤懸海外，又天生此一塊土，以爲蘇州之屏障，江海之鎖鑰者也。若常鎮之所防者，在江而不在海。海寇入江，由江兩岸登陸之路，廖角嘴營前沙，南北相對，爲第二重門戶。周家橋與圖山相對，爲第三重門戶。緊守門戶，堂奧自安。若三門稍有疏虞，至不得已而守金焦兩岸，謂之下策矣。故其分守也，蘇松專防海，常鎮兼防江。由浙之乍浦以東，則松之金山衛扼其衝。于是有參將之設。而若華亭之柘林，上海之川沙，則各設陸兵把總屯守之。由松之黃浦以北，則蘇之吳淞江口當其吭。于是有總兵之駐劄。把總之哨守。遊兵把總之策應。而若太倉之劉家河，常熟之福山港，凡賊舟可入處，則各設水兵把總堵截之。至于崇明孤懸海中，尤爲賊所必經之處，舊設把總一員，駐竹箔沙營，而與營前沙之名色把總往來會哨。又所以巡視海洋，而警報港口也。由蘇而常而鎮，則于楊舍設守備。西與孟河堡之官兵相哨望。于圖山營設把總，西與永生洲新設之遊擊相聲援。又皆所以東堵江口，而遙衛江寧也。所以備蘇松常鎮之寇者，如此。

## 江北

江北局勢與江南浙福不同。難恃舟師。止仗陸戰。狼山當江海之吭。而鹿角掘港。皆揚之東南界也。胸山據淮海之首。鬱州嚶遊山。皆淮之東北境也。中包泰興之周家橋。鹽城之射陽湖。山陽之雲梯關。廟灣等處。此皆據守所當先者。而賊入海之道有二。其一曰新港。卽所謂三江口。蓋由江南狼山。越儀真瓜州而入。登岸則卞家墳。周家墳。稍折而東。則揚州矣。此可入以登岸。亦可從以出海者也。其二則蛤蜊麻線等港。與沿北大海口。大海口。有水陸路。南通廟灣。與劉家莊。姚家灣。俱爲大鎮。賊若據此。官軍屯于湯潮岸等處。賊南尋新港。路出不得。則必北尋大海口而出。勢所必然。若安東海州之東北。有大北海。不惟道里迂遠。且砂磧甚多。此不可運舟者也。蠟港新插港之東。亦有北海。砂磧亦多。此但可從而入。不可出者也。是賊出海之路止有三途。若其登岸之處則不一。東則廖角嘴。呂四場。西則楊樹港。徐沙營。又西則狼山。楊樹港。北則新插港。掘港。皆其所從以登岸而入寇之路也。故其分守也。則江海淮三者竝防。廖角嘴之大河口。突出東南。則設把總。沿而西。若狼山爲通州門戶。則設把總。通州爲全揚之門戶。則有總兵特駐焉。又西設周家橋把總。以防泰興之衝犯。又西設三江會口把總。設儀真瓜州守備。以防內地之突入。皆意專防江。其自海門而北爲蠟港。則設守備。又自新插港轉而西北爲鹽城。則設守備。又西北爲廟灣。則設遊擊。皆以防東海一帶各港岸之登犯。自雲梯關以東爲東海守禦所。則設把總以防賊。由海入淮之路。又于楊州設陸營官兵。以待調遣接應。所以備淮楊寇者如此。

### 登萊

登萊二郡凸出于海，如人吐舌，東南北三面受敵，故設三營聯絡，每營當一面之寄。登州營所以控北海之險也。登萊二衛并青州左衛俱隸焉。其策應地方語所則有奇山、福山、中前、王徐前諸所。語寨則有黃河口、劉家江、解宋蘆、馬停、阜河、馬埠諸寨。語巡司則有楊家店、高山、孫芥鎮、馬停鎮、東良、海口、柴葫、海倉、魚兒鋪、高家港諸司。其在海外則島嶼環抱，自東北崆峒半洋西抵長山、蓬萊、田橫、沙門、鼉砣、三山、芙蓉、桑島、錯落盤銘，以爲登州北門之護。過此而北則遼陽矣。此天造地設之險也。然諸島雖近登州而居島中以取魚鹽之利者，乃遼陽之編伍，非山東之戍卒也。叫喚跳梁，可畏而不可恃。故北海之濱，既有府治而復建備倭城于新河海口，以爲屏翰。且有本營之建焉，而但建水寨于島嶼，良有以也。夫島嶼既不設險，則海口所係非輕。自營城以東，若抹直、石落灣子、劉家汪、平暢蘆諸處，自營城以西，若西工莊、西山、孫家海、洋山、後八角城、後芝罘、莒島諸處，皆可通番船登突。嚴外戶以綏堂閫，其本營典守之責乎。登萊突入海中，至文登縣，尤其東之盡處也。成山以東，若旱門灘、九峯、赤山、白蓬頭諸島縱橫，沙磧聯絡，潮勢至此，衝擊騰沸，議者謂倭船未敢倖達。然考之明初，倭寇成山海側居民，重罹其殃。倭果畏海，奚而有是哉。故文登縣東北有文登營之設，所以控東海之險也。寧海、威海、成山、靖海四衛皆隸焉。其策應地方語所則有寧峯、海陽、金山、百尺崖、尋山諸所。語寨則有青泉、赤山等寨。語巡司則有辛汪、溫泉鎮、赤山寨諸司。遼而北則應援乎登州，迤而南則應援乎即墨。三營鼎建，相爲犄角，形勝調度，雄且密矣。其與江南省連壤者爲即墨縣。南望淮安東海，所城左右相錯，如咽喉關鎖。倘海波告警，淮楊被刦，則自淮達萊，片帆可

至也。故卽墨所係較二營似尤爲要。自大嵩、鼇山、靈山、安東一帶南海之險皆本營控禦之責。其策應地方語所則有雄崖、膠州、大山、浮山、夏河、石洞諸所。語巡司則有乳山、行村、栲栳島、遼猛、南龍灣、古鎮、信陽、夾倉諸所司。其海口若唐家灣、大任、陳家灣、鵝兒、栲栳、天津灣、顏武、周睡、松林、全家灣、青島、徐家莊諸處俱爲衝要。隄防尤難。封守者可勿慎乎。故其分守也。自青之贛榆界而東于安東衛設守備分哨至萊之高密界而止。萊自古鎮巡司而東于靈山衛之沙溝設守備分哨遼猛以西之海口又於卽墨縣治南設守備分哨浮山以東之海口又東則于登之萊陽大嵩衛設守備又折而東北則于文登設守備以協防東南兩面之險又折而西北則于府治之北特有副總兵之駐劄設水陸兩遊擊分扼兩港岸前哨旅順以協防北海一面之險又西爲萊之西北界則設王徐寨守備防守白浪新河等九海口又西則于府治設遊擊南策卽墨北應王徐而海與青州之聲援接又西則于青州設遊擊南策安東北守唐頭營一帶而西與武德二守備之聲援接所以備山東寇者如此。

#### 沿海全境

沿海自廣東樂會縣接安南界起歷海條粵爲文昌界鋪前港爲會通界神應港豐盈浦爲瓊州界麻頭浦呂灣浦爲臨高界田禾灣爲儋州界義詐山爲昌化所界歷白沙營爲感恩縣界大洞天小洞天爲崖州界牙娘澳雙洲門爲陵水縣界七十二徑牙山淡水灣爲欽州界草木營烏雷山爲靈山縣界青嬰池楊梅池平江池爲廉州界邵州爲永安所界柳州爲康海所界潯州爲錦農所界調洲獨豬山爲石城千

戶所界。鋼洲小黃程汾洲爲寧川所界。青聚山羅浮峯爲神電衛界。海凌山爲雙海所界。小蓬山爲海朗所界。中獲山爲陽江所界。大獲山爲新寧縣界。西熊山、鵝洲山爲新會縣界。萬斛山上川山爲順德縣界。石岐峯爲香山縣界。蛇西山、大南常山爲南海番禺界。烏沙洋爲白沙巡司界。九星洋爲福永巡司界。珊瑚洲渡杯山爲東莞縣界。合蘭洲爲大鵬所界。馬鑾洲爲鐵岡驛界。寧洲山、桔州山爲惠州界。記心洋爲平海所界。徐娘山爲海豐縣界。大星尖山、捷勝所界。吉頭峯爲碣石衛界。前標峯爲甲子門所界。陶娘灣靖海島爲靖海所界。大浮山、玉嶼山爲潮陽縣海門所界。小柑山爲蓬州所界。大柑山爲大城所界。大京山、九猴山爲饒平縣界。計五千里。抵福建南澳山爲元鍾所界。歷侍郎洲、石城嶼爲銅山所界。歷鴻儒嶼、沙汭島爲陸黿所界。大散嶼、壁洲山爲鎮海衛界。小散嶼爲月港界。舊活嶼爲高浦所界。嘉禾山大担山爲中左所界。小担虎頭山爲金門所界。大登山、小登山爲福全所界。大捕山、小捕山爲永寧衛界。呈埭峯、獼窠峯爲崇武所界。沙塘灣爲惠安縣界。漂嶼、白嶼爲峯尾巡司界。湄洲山爲南泉寨蒲禧所界。石獅峯、小粵峯爲平海衛界。呈口三江口爲沖心巡司界。網山、王家嶼爲萬安所界。六湖山、碧水島爲鎮東衛界。鹽門山爲蕉山巡司界。日嶼、月嶼爲梅花所界。卽會城三坡、焦五虎粵爲連江界。下干塘四嶼爲定海所界。花瓶爲北菱巡司界。飛鸞渡爲寧德縣界。青山峯爲大金所界。天千山、丁家程、大俞山、三星山、流江爲福寧州界。計二千里。抵浙江懸中峯爲蒲門莊土二所界。歷長沙門、大崑山爲金鄉衛界。鳳凰山爲平陽所界。銅盆山爲沙園所界。仙口峯、飛雲渡爲瑞安所界。大衢山、海安港爲海安所界。霓島、披山爲寧村所

界黃華港爲磐石衛界。太巖頭爲磐石後右界。前山鑿斗門爲蒲岐所界。九眼塘斗山關爲三山巡司界。丫髻峯爲楚門所界。臨門隘爲臨頭所界。省梅坑爲沙角巡司界。大陳山石塘港爲松門衛界。金青閘西嶼閘冰豐閘皆朱文公所造。爲新河所界。金沙灘鑑焦爲海門衛界。海門港爲海門前所界。五嶼爲桃渚所界。三門山爲健跳所界。石浦港爲前後二所界。青苔灣爲昌國衛界。小目山爲爵谿所界。西廚山爲前倉所界。孝順洋白塗爲大嵩所界。大射山爲穿山所界。洛茄山長白山爲中左所界。大魚灣爲長山巡司界。招寶山中子山爲定海衛界。金家島爲寧波界。邱家洋爲慈溪界。金塾浦爲龍山所界。松浦港爲松浦巡司界。橫山爲觀海衛界。破山浦爲三山所界。化龍浦爲餘姚界。臨山港爲臨山衛界。西海塘爲上虞界。漁山蒙池臺爲紹興三江所界。甌子山爲蕭山界。和尚山栲門爲會城界。茶浦門爲海寧所界。大衢山小衢山爲澈浦所界。桑扶山爲海寧衛界。西海口馬蹟山北丁興殿前山淡水門爲乍浦所界。計二千七百里。抵江南省三姑山爲金山衛界。胡家港爲金山巡司界。上釣山中釣山下釣山大盤山爲青村所界。蒲島爲南匯所界。陳前山茶山爲南贛巡司界。寶山爲上海界。永字山分水焦海焦山綏洶港爲吳淞所界。浪岡山顧涇港爲嘉定界。竺箔沙送信嘴小團沙新安沙爲太倉界。大陰沙管家沙爲崇明福州狼山三權口爲通州千戶所界。塘家港海門島爲泰州界。亂沙新洋港爲鹽城界。開山淮河口鷺山爲安東界。蚶山高公島爲海州所界。清河口巴頭河爲贛榆界。旬島勞山島爲安東界。孤着山爲石臼所界。計一千八百里。抵山東青沈峯。歷胡家峯爲高港巡司界。沙嘴峯爲靈山衛界。黃埠峯爲夏河塞界。洋河峯爲膠州

界。大勞山、田橫島爲鼇山衛界。走馬峯爲卽墨界。馬山爲浮山所界。旬島、赤島爲雄崖所界。吾島、徐福山爲大山所界。巨高島爲大嵩衛界。竹島爲海隅所界。松島、莫邪島、漫鷄島爲靖海衛界。佛島爲津寧所界。五疊島、下勞山爲尋山所界。歇馬墩、洛口堡爲成山衛界。海牛島爲不夜城界。寶家峯爲百尺巖所界。古陌頂爲威海衛界。父島爲金山所界。新安堡、戲山峯爲海寧衛界。海鷄山爲甯司寨界。武家莊爲馬埠寨界。洋山爲萊州界。八角島、盤蟻島爲登州界。劉家窪爲盧洋寨界。沙門島爲解宋寨界。單山爲黃縣界。桑島爲馬停寨界。龜島爲昌邑縣界。歇末島爲壽光界。都里鎮爲蒲臺界。青島爲利津界。黃島爲賓州界。直沽口爲寶坻縣界。塔山爲盧龍衛寨界。南半洋山爲昌黎縣界。計一千二百里。抵遼東北半洋山爲山海衛界。蔬菜島爲中前所界。牛車島爲中後所界。孤山爲中右所界。向陽島、羅兒島爲金州衛界。石灘島爲左所界。東雲島、黃駝島爲蓋州衛界。屏風山爲復州衛界。鳳凰山爲中左所界。女兒河爲中屯衛。右屯衛界。遼河渡、古寺島爲廣寧衛界。麻田島、平島爲海州衛界。湯站堡爲鎮遼所界。臨江爲義州界。計一千三百餘里。爲鴨綠江、朝鮮界。